



## Bot Amphibia Qber II untuk kegunaan musim banjir

Oleh **Nazdy Harun** - September 4, 2022 @ 12:24pm  
[bhnews@bh.com.my](mailto:bhnews@bh.com.my)



Ketua Polis Terengganu, Datuk Rohaimi Md Isa (kanan) bersama Ketua Polis Daerah Hulu Terengganu, Deputi Superintendant Mohd Adli Mat Daud (kiri) melihat bot Amphibia Qber II, yang dihasilkan Kumpulan Inovatif dan Kreatif (KIK) Ibu Pejabat Polis Daerah Hulu Terengganu. NSTP/Nazdy Harun

**KUALA BERANG:** Banjir yang kerap melanda daerah ini mendorong sekumpulan pegawai dan anggota polis dari Ibu Pejabat Polis Daerah (IPD) Hulu Terengganu menghasilkan kenderaan dua alam atau dikenali sebagai bot Amphibia Qber II.

Ketua Polis Terengganu, Datuk Rohaimi Md Isa, berkata bot berkenaan yang dibina dengan kos lebih RM10,000 itu mampu beroperasi di daratan dan air.

Katanya, bot berkenaan berfungsi sebagai kenderaan menyelamat, terutama pada musim banjir yang sering melanda daerah ini.

"Amphibia Qber II adalah produk inovasi yang dihasilkan Kumpulan Inovatif dan Kreatif (KIK) IPD Hulu Terengganu.

"Bot ini amat praktikal untuk digunakan di kawasan kampung yang mempunyai laluan sempit kerana saiz bot yang dibina lebih kecil," katanya ketika ditemui selepas Majlis Perasmian Produk KIK IPD Hulu Terengganu di Pengkalan Lawit Tasik Kenyir, di sini, semalam.

Rohaimi berkata, daerah ini sering kali dilanda banjir apabila tiba musim tengkujuh dan Amphibia Qber II adalah produk kedua yang dihasilkan oleh KIK IPD Hulu Terengganu.

Katanya, produk pertama yang dihasilkan sebelum ini terlalu besar berbanding bot yang baharu ini selepas melalui penambahbaikan.

Beliau berkata, jika bot yang dihasilkan sebelum ini perlu ditarik oleh pacuan empat roda, bot ini hanya ditarik dengan menggunakan all terrain vehicle (ATV).

"Bot yang mengambil masa enam bulan untuk disiapkan ini mampu memuatkan enam penumpang pada satu-satu masa," katanya.